

*Pagtulon-an 19 — Ang Bukid Sa Kalbaryo
Milandong Sa Dalan Sa Gingharian*

KATUYOAN: Sa pagtudlo sa pagpaila sa mga magtotoo diha kang Cristo sa Iyang kamatayon ug pagkabanhaw.

Namatikdan ba nimo nga samtang kita nagapanaw nagakaduol kita sa unang bukid nga nakita sa mga manalagna? Ang unang bukid nga nakita sa mga manalagna mao ang BUKID SA KALBARYO. Sa atong miagi nga pagtulon-an atong nakita si Juan Bautista nagaandam sa dalan sa Hari pinaagi sa pagtawag sa mga Israelitas sa paghinulsol ug pagpabautismo. Dayon atong nakita nga bisan si Jesus, ang manluluwas, miadto sa pagpabautismo. Kini lamang ang bugtong nga paagi nga Iyang ikapakita ug ikapaila ang Iyang kaugalingon ngadto sa Iyang mga katawohan. Karon atong mahibaloan nga si Cristo nabautismohan didto sa Kalbaryo, dili sa tubig sama sa gigamit sa pagpamautismo ni Juan, kondili bautismo nga kamatayon.

Wala madugay sukad sa Iyang pagsulod sa Jerusalem nga nagakabayo sa asno, si Jesus nangutana sa Iyang mga apostoles sa pagingon, "Sumala sa sulti sa mga tawo, kinsa man kono ang anak sa tawo?" Basaha ang Mateo 16:13-19. Ug ania ang pipila ka mga katarungan.

1. Gitawag ni Jesus ang mga Judiyong nanagpanoo nga Iyang Iglesia (Mateo 16:18). Ang kahulogan sa Iglesia mao ang "mga tinawag." Diha sa Gingharian ang nasud Israel mahimo nga nasud sa mga sacerdote aron sila ang magadala sa mga Gentil sa pagngadto kang Cristo. Ug kini sila gitawag nga "Iglesia atang sa Gingharian."

2. Ang Iglesia sa Gingharian kinahanglan pagatukoron diha mismo kang Cristo, ang pamag-ang nga bato, ug si Pedro mao ang gihatagan sa yawi (autoridad) sa pagbukas sa dalan ug pagdapit sa uban.

3. Wala madugay human gihatag kini nga saad ngadto kang Pedro, si Cristo miuna sa pagpahibalo nga Siya pagapatyon, sa dili pa ang gingharian matukod, Mateo 16:21. Sa Mateo 20:20-23 si Cristo naghigut mahitungod sa Iyang umaabut nga mga pagantus ug sa kamatayon nga igabautismo Kaniya. Kini mao ang gitawag nga, ang bautismo Niya nga kamatayon.

Ang panahon nagakaduol na sa diha nga ang Hari ug Manluluwas magantus tungod sa kamatayon nga ibautismo Kaniya.

1. Usa ka adlaw si Jesus miingon ngadto sa Iyang mga apostoles, "Kamo mahibalo nga duha ka adlaw sukad karon mao na ang fiesta sa Pasko (kining mao nga pasko mao ang pagsaulog sa unang PASKO nga gihimo didto sa DALAN SA SAAD sa ilang paggawas sa Egipto) ug ang Anak sa Tawo igatugyan na aron ilansang sa krus." Mateo 26:1-3.

2. Samtang sila nangaon sa panahon sa pasko si Jesus miingon, "Sa pagkatinuod niagaingon Ako kaninyo, nga usa kaninyo magabudhi Kanako," Mateo 26:21-29. Ug sa nakaawit sila ug usa ka awit sila nangadto sa bukid sa mga Olivo.

3. Si Jesus nag-ampo, "Kon mahimo man, isaylo lang kanako kining kopa . . ." Mateo 26:35-45.

4. Samtang namulong Siya niini, ang mga dautan nga mga tawo miabut, pinangulohan ni Judas, aron Siya dakpon. Mateo 26:47-56.

5. Siya gidala sa atubangan ni Caifas ug gitumo-tumoan pagsumbong, Mateo 26:57-68.

6. Gidala Siya sa atubangan ni Pilato nga nangutana Kaniya, "Mao ba ikaw ang Hari sa mga Judiyo?" Si Jesus mitubag kaniya, "Sumala sa ginaingon mo, mao ako." Gisul-oban nila sa kupo nga mapula ug gipurong-purongan sa tunok ug gipakupot ug baston sa too niya nga kamot. Ug gibugal-bugalan Siya nila sa pagingon, "Mabuhi ang Hari sa mga Judiyo." Gilud-an nila Siya ug gihapak sa baston ang Iyang ulo. Ug kining tanan motukma gayud sa gipamulong sa mga manalagna mahitungod sa mga pag-antus ni Cristo diha sa Bukid sa Kalbaryo.

7. Gidala nila Siya ngadto sa dapit sa kalabera ug gipainom Siya sa bino nga sinambugan ug apdo ug gilansang Siya sa krus. Mateo 27:27-35. Ug ibabaw sa Iyang ulo gibutang ang sumbong batok Kaniya: "Mao kini si Jesus, ang Hari sa mga Judiyo."

8. Dihay duha ka kawatan nga gilansang kauban niya. Ang usa nagpili sa dalan sa kinabuhi ug ang usa nagpili sa dalan sa kamatayon. Ang nahiuna miingon, "Jesus hinumdumi ako inig-abut mo sa imong gingharian," apan ang usa nagbugalbugal, Lucas 23:39-45. Si Jesus mituaw sa makusog, "Tapus na!" Ug mitugyan sa Iyang Espiritu, Juan 29:30. Ug sa pagkasawomsom na, si Jose nga taga Arimatea miabut ug mihangyo nga Iyang ipahaluna ang lawas ni Jesus ug Iyang gibutang didto sa Iyang lubnganan ug giligid ang usa ka daku nga bato ug gisap-ong sa pultahan, Mateo 27:57-61. Ang Hari namatay na, Mateo 28:1-6.

Angay ba gayud nga si Jesus mamatay? Dili. Ang bayad sa sala mao ang kamatayon, apan si Jesus wala gayud makaila ug sala; ug angay unta nga Siya mabuhi hangtud sa walay katapusan, apan ania ang hinungdan.

1. Ang gilansang sa krus mao ang atong mga sala, 1 Corinto 15:3,4. Gipas-an Niya ang atong mga sala ug gisul-ob ang kupo nga mapula, aron kita magasul-ob sa kupo sa pagkamatarung.

2. Gipurongpurongan Siya sa tunok aron kita mapurongpurongan sa Corona sa pagkamatarung, 1 Timoteo 4:8.

3. Gipakamatayan Niya ang atong kamatayon ug nabanhaw aron kita usab may pagkabanhaw ngadto sa kinabuhi, Roma 6:4. Kon atong dawaton Siya nga manluluwas ang Espiritu Santo mao ang magabautismo kanato ngadto sa Lawas ni Cristo ug pinaagi niini mapaila kita uban kang Cristo ug ang bautismo Niya sa kamatayon mahimong atong bautismo, ug sa Iyang paglubong, gilubong usab kita uban Kaniya, ug sa Iyang pagkabanhaw, nabanhaw usab kita uban Kaniya. Ug karon kay bag-o na man kita nga binuhat magalakaw kita sa bag-o nga kinabuhi.

SAG-ULOHON: "Busa, pinaagi sa bautismo gilubong kita uban Kaniya ngadto sa kamatayon, aron nga maingon nga si Cristo gibanhaw gikan sa mga patay pinaagi sa himaya sa Amahan, kita usab managgawi diha sa kabag-o sa kinabuhi." Roma 6:4.

Pagtulon-an 19 — Pagatubagon

Ang mosunod nga mga grupo sa pulong mahimong tinuod o bakak. Busaha ang mga bersikulo nga gihatag sa ubos ug isulat ang (T) kon tinuod ug (B) kon bakak.

1. Ang mga profeta nakakita sa mga pag-antus ni Cristo sa Bukid sa Kalbaryo. Salmo 22:16

2. Si Cristo nagpahibalo sa Iyang umaabut nga kamatayon nga usa ka bautismo? Mateo 20:22.

3. Si Pilato nangutana kang Jesus kon tinuod ba gayud nga Siya ang hari sa tibook kalibutan. Mateo 27:11.

4. Si Cristo kinahanglan mamatay tungod kay Siya nakasala. 1 Corinto 15:3 ug Hebreohanon 7:26.

5. Kon dawaton nato si Cristo nga Manluluwas kita mabautismohan ngadto sa Iyang kamatayon. Roma 6:3,4.

6. Ang Espiritu lamang ni Cristo ang nabanhaw gikan sa lubnganan. Lucas 24:37-39.

7. Dili lamang kay kita nabautismohan ngadto sa Iyang kamatayon, apan kita usab nabanhaw uban Kaniya sa bag-o nga kinabuhi. Roma 6:4.

8. Ang bautismo sa Espiritu Santo maoy naghimo kanato nga miembro sa simbahan dinhi sa yuta. 1 Corinto 12:13.

9. Pagsulat ug hamtubo nga kasaysayan mahitungod sa paglansang sa atong Ginoong Jesu-Cristo. Mateo 27:27-50.

.
.
.
.
.
.

10. Isulat nga SINAG-ULO ang Roma 6:4.

.
.